

1 Tesalonaeka

Nəkwəkwə yame Pol rimnəkupən mirai ramvən kimi nəməhuak minə apa Tesalonaeka

Nəgkiarien kwəkwə kape nəkwəkwə e 1 Tesalonaeka

?Pa rimirai nəkwəkwə e? Aposol Pol rimirai nəkwəkwə e.

?Rimirai ramvən kimi nipa? Rimirai ramvən kimi niməhuak apa Tesalonaeka.

?Nimraghien rimnhawor pən iran minə ye nipig rinamrai nəkwəkwə e? Niməhuak apa Tesalonaeka, in niməhuak vi kirik. Pol rirkun ta niməhuak apa Tesalonaeka ye newk kiraru uə kisisər. Nəməhuak minə aikin tukasəkeikei mhaurə ye nimraghien kapəriə. Kashatətə ye Yesu Kristo, kamuh əriə tiksın, kasərig nəmħəyen. Kini tiksın khapəh nharkun-huvəyen nipig kape Yesu Kristo yame tukrirerig-pə min iran ye tokrei tanə. Tiksın rikiriə raməsik mə Yesu tukrirerig-pə aihuaa əmə. Kini miseinein mə narmamə yamə mine kwnəhamhə ta kwasig ikin Yesu rirerig-pə min, tukhawor əriə. ?Tukasarer min uə?

?Rimirai nəkwəkwə e tuk naha? Pol rimirai nəkwəkwə e mə tukrivəhsi-haktə nətərigien kapəriə, kini mor nhatətəyen kapəriə rəusik-əusik. Kini morkeikei mə tukrivəh-sipən nhajounien yame ratuatuk ye nikarin kape nirerig-pə-minien kape Yesu Kristo.

Pol rimnokrən huvə ye nəməhuak minə apa Tesalonaeka

1 ¹ Yo Pol, mine Saelas, mine Timoti, yakarhini rhuvə tuk əmiə ye niməhuak apa Tesalonaeka. Kimiə nimnhauə kirikianə tuk Rimtawə Kughen mine Yermaru Yesu Kristo.^a

^a 1:1 Wok 17:1-9

Pəh Kughen tukrautə-pre kin kafan nihuvəyən mine nəmərinyen kimi əmiə.

²Nipig m-fam, yakarhini-pən tuk Kughen mīrhmə rikimasir ramagien tuk əmiə m-fam, kini marhəhuak tuk əmiə ye nəhuakien kapəmasir.

³Nipig yakarhəhuak kimi Rimtawə Kughen, rikimasir ramagien meinai nipig mifam rikimasir raməsik kapəmiə wok yame ramsi-pən ye nhatətəyən kapəmiə. Kini rikimasir raməsik mə norkeikeiyen kapəmiə rehuə, naksasitu ye narmamə. Kini rikimasir raməsik min narer-tim-timien kapəmiə ye nipig əutən yamə mine kamhauə ye nimraghien kapəmiə. Kini naksor məknakin meinai nimisərhə-pən tim tim nərigien kapəmiə ye Yesu Kristo Yermaru kapətawə.^b

⁴Piak minə, mine nowinik yamə mine Kughen rorkeikei əmiə: Rikimasir ramagien min tuk əmiə meinai yakrhirkun mə Kughen rimirpen əmiə.

⁵Kini yakrhirkun mə Kughen rimirpen əmiə meinai nəvsaoyen huvə yame yakarhini tuk əmiə, pəh nien mə ramuə ye nəgkiarien əmə, mərig Nanmin kape Kughen rimnor nar apsis tiksin irəmiə, ramor nimtətien mə nəgkiarien kafan ror nanmin, kini kitawə kharkun huvə mə in nəfraksien. Kini nipig kimnisaṛə kitawə-m kimie, nakharkun mə norien kapəmasir in rhuvə əmə mə tukrasitu irəmiə.^c

⁶Kini kimie nimnhasigovin norien kapəmasir mine Yermaru kapətawə. In e ye nipig yame nimnhavəh pawk nəmhəyən ehua, mərig nimnhavəh nəvsaoyen huvə kape Kughen yerkin agien yame Nanmin kape Kughen ravəhsi-pə.^d ⁷Ror məkneikin, ye norien kapəmiə, nimishajoun swatuk huvə kirik kimi nəməhuak minə ye provins e Masedonia mine apa Provins Akaea, mə tukhasigovin əmiə. ⁸Nimnhani-ərhav nəgkiarien kape Kughen rəmhen kin yame naiyuk ramasək kamərig ikin minə fam. Kini pəh nien mə nəmə Masedonia mine Akaea əmə, mərig narmamə ikin minə fam kharkun kapəmiə nhatətəyən ye Kughen, kini ripəh nəmhenien mə to yakarhini min nhatətəyən kapəmiə, meinai narmamə minə fam kwəsərig ta nəvsaoyen kin. ⁹Meinai nəmə Masedonia mine Akaea, iriə atuk kamhani-ərhav mə nipig yimīrhua mīrhəm əmiə, rikimie ragien tuk niwəhyen nəgkiarien kapəmasir. Iriə kamhani-ərhav mə kimie nimnhaukreikin-pən nimetaimie kimi nanmi kughen eikuə minə, mhuə mhakwasig kin Kughen yame ramragh, kini in Kughen əfrakis. ¹⁰Mamhawhin min Ji Kughen yame tukrisi-faktə ye rao ye neai, yame Kughen rimivəh miragh In ye nimhəyən kafan. Kini In tukrirəhsita ətawə tuk narpinien mine niemhaa kape Kughen yame tukripiuə.

Wok yame Pol rimnor apa Tesalonaeka

2 ¹Piak minə mine nowinik minə: Nakharkun mə nipig kimasir yimīrhurə mīrhəm əmiə, nuəyən kapəmasir, pəh nien mə ror

^b 1:3 1 Kor 13:13; Kol 1:4-6 ^c 1:5 1 Kor 2:4-5 ^d 1:6 Wok 17:5-9

əmə nar apnapig kin, mərig in rimnor nəkuə. ²Kini kimia nakharkun mə in apa Filipai, narmamə kimisor rahah pawk pə kimi əmasir, kini mashek iah əmasir, mərig Kughen kapətawə rimnasitu irəmasir, kimasir yakarhətgəhaa kin nırhini-ərəhavyen kafan nəvsaoyen huvə kimi əmia, nar apnapig narmamə kasarkut mə tukhani-əhu əmasir.^e ³Ror məkneikin meinai kapəmasir nəgkiarien tuk nıviyen nərigien kapəmia ripəh nısi-pənien ye nərigien hah kirik, uə tuk rikin yame ripəh natuatukien. Kini yimirhipəh nırharkutien tuk neikuəyen irəmia. ⁴Nikam. Yimirhipəh nırhorien məknakin. Mərig nipig yimirhəgkiar, yimirhirkun mə Kughen rivaag-pə yerkimasir, məm mə kimasir yakrhəmhən mə jakrhini-ərəhav nəvsaoyen huvə, kini maməəhu-pə ye kwermimasir. Kini pəh nien mə yimirhəgkiar mə narmamə rikiriə tukragien tuk əmasir. Mərig yimirhəgkiar mə Kughen rikin tukragien tuk əmasir. In Kughen yame riwaag-pə yerkimasir.^f ⁵Nakharkun mə kimasir yimirhipəh nırhuəyen tuk əmia mə jakrhivi nərigien kapəmia ye nəgkiarien heikən minə. Pəh nien mə yimirhini-ərəhav nəvsaoyen huvə kimi əmia mə jakarhivəh mane kapəmia. Kini Kughen, In rirkun rikimasir mə yakarhəfrakis. ⁶Kimasir yimirhipəh nırhuəyen mə kimia kirik uə yermamə apnapig kirik tukrivəhsi-haktə əmasir.

⁷Kimasir e aposol misir kape Kristo, yakrhirkun nırharkutien kimi əmia mırhimə taksəkeikei mhasiai əmasir rəmhən kin yamehuə misir mərig yakrhipəh nırhorien. Nipig yimirharə kitawə-m kimia, norien kapəmasir rimar, rəmhən kin yame mamə ramarha huvə tuk tini minə. ⁸Rikimasir ramagien mə yakarhini-ərəhav nəvsaoyen huvə, mərig pəh nien mə yakarhini-ərəhav əmə, mərig yakarhor narimnar fam yame yakrhirkun nırhorien mə tukrasitu irəmia. Rəmhən kin yimnarhivəh-si-pre nimraghien kapəmasir kimi əmia, meinai kimia nimnhauə mə kapəmasir narmamə keikei minə. ⁹Piak minə mine nowinik minə, ?Rikimia raməsik nəmnhawkien kapəmasir uə nikam? Nipig yimirharə kitawə-m kimia mırhəvsao-ərəhav kin nəvsaoyen huvə kape Kughen kimi əmia, kimasir yimirhor wok yenpig mine yeraan mə jakhavəh mane kirik mırhipəh nırhaiyoh-preyen kin nasituyen kimi əmia.^g

¹⁰Kimia nımisəm mharkun nhani-ərəhavyen mə nipig yimirharə kitawə-m kimia nəməhuak minə, norien kapəmasir in ratuatuk; kini Kughen raməm əmə mə norien kapəmasir in ratuatuk, kin rikin ramagien tukun. Kini nar kirik rirkək mə to kini-hah əmasir iran. ¹¹Kini nakharkun mə kimasir yimirhor rhuə pən kimi əmia m-fam ramhən kin yame tatə ramor rhuə-pən kimi tini minə. ¹²Kini ye norien kirikianaə əmə min, yimirhərip tımtim əmia, kini marharəhsi-haktə kapəmia nərigien, marhəkeikei kimi əmia mə nimraghien kapəmia tukratuatuk ye

^e 2:2 Wok 16:19-24; 17:1-9 ^f 2:4 Gal 1:10 ^g 2:9 Wok 20:34

nimri Kughen, pəh rikin tukragien tukun. Kughen e rimnokrən kin əmiə mīmə takhauə pəh In ramarmaru irəmiə, mīpik əmiə naksarə ye rao ye neai.^h

¹³ Kini nīpig m-fam, kimasir yakarhini vi vi Kughen meinai nīpig nimnhavəh nəgkiarien kape Kughen yame nimisərig tuk əmasir, kini mhavəh rarə yerkimia, kini rikimia ripəh nəsikien mə in nəgkiarien kape narmamə əmə, mərig rikimia rimnəsik mə in nəgkiarien kape Kughen. Kini nəfrakisien mə in nəgkiarien kafan. Kini nəgkiarien e ramor wok ye nīmraghien kapəmiə, kimia en narmamə yamə mine nakamhani nəfrakisien iran.ⁱ ¹⁴ Piak minə mine nowinik minə, yakrhirkun mə nakwənhavəh nəgkiarien kape Kughen yerkimia meinai nimisor rəmhen əmə kin nəməhuak minə kape Kughen apa Judia kimisor. In e, iriə kwənhauə kirikianə ye Yesu Kristo, məkneikin nəmə iməriə ikin, nəmə Isrel, kimisara mamhauh əriə. Kini nəmə iməmiə ikin kimnhauh məknakin əmiə.^j ¹⁵ Nəmə Isrel a kimishopni Yesu Yermaru, mine profet kape Kughen minə, misher-yerhav min kin əmawə yakhaier. Iriə a tikmir minə kape narmamə mifam. Norien kapəriə ramor riki Kughen rapəh nagienien,^k ¹⁶ meinai kimawə yakhamə jakhani-ərhav nəgkiarien kape Kughen kimi narmamə yamə mine pəh nien mə kwənərəus kape Isrel, mə Kughen tukrivəh miragh əriə, mərig nəmə Isrel tiksın kasərer əswasig kin əmasir. Ye norien e, nīpig mifam, iriə kasəwhai kəji norien has kapəriə rehuə mapita. Taktəkun ai, niemhaa mine narpinien kape Kughen ruauə tuk əriə.

Pol rimə tukruə məm nəmə Tesalonaeka

¹⁷ Piak minə mine nowinik minə: nar apnapig mə yakahrarə isok tuk əmiə tuk kwənpər nīpig, mərig yakrhorkeikei pik mə jakrhurə mirhəm əmiə. Nəfrakisien, nīpraitawə isok tuk ətawə minə. Mərig nətərigien kapətawə kirikianə. Kini yakrharkut pik mə jakrharerig-pre mirəm əmə. ¹⁸ Yimirhorkeikei pik mə jakrhurə mirhəm əmiə. Yo Pol, yimnarkut nīpig ripsaah, mərig Setan rimnərer əswasig kin əmasir. ¹⁹⁻²⁰ Yakrhorkeikei pik mə jakrhurə mirhəm əmiə meinai rikimasir ragien tuk əmiə. Kini yakrhərəhu-pən əsik-əsik nərigien kapəmasir mə nīpig Yesu Yermaru tukrirerig-pə min, jakrhagien pik mirhini-pən tukun mə kimia e kwənkwai wok huvə kapəmasir.^l Nəfrakisien, rikimasir ramagien pik tuk əmiə.

3 ¹ Yakrhipəh nīrhəmien əmiə ror tu, rikimasir rəpou; ipakə rikimasir rimnərkwopir. Kimasir yakrheinein mə kimia naksarə huvə uə nikam. Kini kimasir yimirhini mə kimru [Saelas] jakawarə əmə e Atens,^m

^h 2:11-12 Wok 20:31 ⁱ 2:13 2 Tes 2:13 ^j 2:14 Wok 17:5 ^k 2:15 Wok 9:23,29; 13:45,50; 14:2,5,19 ^l 2:19 Fil 2:15-16; 4:1; 2 Tes 1:4 ^m 3:1 Wok 17:15

²mwher-pre Timoti mə tukrurə məm əmiə. In piautawə kirik yame ramor wok kape Kughen kimasir min tuk nini-ərhavyen nəvsaoyen huvə kape Kristo. In rimaure tuk əmiə mə tukrasitu irəmiə miwəhsi-haktə kapəmiə nərigien, kini mor əmiə naksərer tim tim ye nhatətəyen kapəmiə,ⁿ ³mə nahasien yame ramuə taktəkun tukripəh norien rikimiə rətərig pik. Nakwənharkun ta mə nətərigien kape Kughen e mə narmamə tuskor ahas pə kimi ətawə.^o ⁴Nəfrakisien, nipig yimihramir kitawə-m kimia, yimirhini mirhimə tukor ahas pə kimi ətawə. Kini kimia nakharkun huvə mə ruauə minor nəfrakisien kin rəmhen əmə kin yame kimasir yimirhini ta. ⁵Tuk nar a, nipig rikikrimnəpou pik meinai yimneinein mə kimia nimis-haw-arə, kini yimnher-pre Timoti mə tukrurə məm-ru nhatətəyen kapəmiə, mə ramskai uə nikam. Yimigin mə, Setan yame in yermamə kape nivəh-sipən-vəh-sipənien, in tukrəm swatuk kirik tuk nivəhsi-pən-vəhsi-pənien kimi əmiə, mor wok kapəmasir tukror əmə nar apnapig kin.

Timoti raməvsao kin nəmə Tesalonaeka

⁶Mərig taktəkun ai, Timoti ruirerig-pə tuk əmru, kini mivəh nəvsaoyen huvə ye kapəmiə nhatətəyen mine norkeikeien. Mamni-pə tuk əmru mimə rikimiə raməsik əmasir ye nagienien, kini misorkeikei mə taksəm əmasir, rəmhen kin yame kimasir yakrhorkeikei mə jakarhəm əmiə.^p ⁷Ror məkneikin, piak minə mine nowinik minə, nar apnapig mə yimirharə ye nahasien kini mirhərig nəmhəyen, mərig nəvsaoyen kape nhatətəyen kapəmiə rimivəhsi-haktə nətərigien kapəmasir tuk əmiə.^q ⁸Yimirhivəh nəvsaoyen mə naksarer tim tim tuk Yesu Yermaru, yakarhərig mə yakrhəvəh min nimraghien. ⁹Nipig yakarhərer ye nimri Kughen, nagienien kapəmasir tuk əmiə in rehuə, kini yakarhini vi vi Kughen tuk əmiə. ¹⁰Yenpig mine yeraan, ye nipig m-fam, yakarhəhuak əusik-əusik mə jakarhəm min əmiə, kini mirhajoun əmiə kin nar yame nakseinein hanə, mə kapəmiə nhatətəyen tukrurə miskai.

¹¹Kini pəh Kughen kapətawə e Rimtawə mine Yesu Kristo Yermaru kapətawə iriū atuətuk kawor swatuk kimi əmasir kini yakarhurə mirhəm əmiə.^r ¹²Pəh Yermaru kapətawə tukror norkeikeien kapəmiə tuk əmiə mine narmamə m-fam tukrhaktə mokrig marh-yerhav, rəmhen kin yame norkeikeien kapəmasir rehuə tuk əmiə. ¹³Pəh In tukror rikimiə rəsanin mə nipig Yesu Yermaru tukrirerig-pə min iriə kafan narmamə minə, kini taksərer ye nimri Kughen kapətawə e Rimtawə, kini misatuətuk, kini nar kirik rirkək irəmiə mə to kini-hah əmiə iran.

Nimraghien kapəmiə tukraməkeikei mor Kughen rikin ragien

4 ¹Piak minə mine nowinik minə, taktəkun ai jakaməkeikei maməgkiar ye narimnar tiksin. Yakwərhajoun ta əmiə ye naha

ⁿ 3:2 Wok 16:1-3 ^o 3:3 2 Tim 3:12 ^p 3:6 Wok 18:5 ^q 3:7 2 Tes 1:4 ^r 3:11 2 Tes 2:16-17

norien yame taksor mə Kughen rikin tukragien tukun. Kini nəfrakisien naknasor. Kini taktəkun ai yakarhaiyoh əmiə marhuh rikimiə ye nhag Yesu Yermaru mə taksor əmə məknakin mamharpin pəh norien a tukreihua. ² Sor məknakin meinai nakwənharkun ta nəgkiarien yame Yesu Yermaru rimivəhsi-pə nehuəyen kimi əmasir mə jakrhini-ərhav.

³ In e nərgien kape Kughen mə tukrərəhu karin əmiə mə kafan minə mə taksor nar yame rhuvə matuatuk: Takhapəh nisəri-pəniən swatuk kape nīpīraovin mine narman yamə mine kamhakir apis apis əriə minə.^s ⁴ Kimiə kirikianə kirikianə takasəkeikei miseihua ye nīpraimiə ye norien yame rhuvə matuatuk, pəh narmamə tukhasiai əmiə tukun. ⁵ Rikimiə tukripəh nīvən-pikien tuk nīkir-məniwəniən yerman uə piraovin, rəmhen kin yame narmamə yamə mine khapəh nisəhuakien miseinein Kughen kasor.^t ⁶ Takhapəh nisəkrəhyen kin piraovin kape yerman pisin, tamə naksor ahas pən tuk piaumiə minə. Yermaru kapətawə tukripior narpiniən kimi narmamə yamə mine kasor təvhagə has minə a. Yakwərhini-pre ta nəgkiarien a marhor kwirig kin kimi əmiə. ⁷ Ror məkneikin meinai pəh nien mə Kughen rimnokrən kin ətawə mə tuksəmkimik ye nīmrin, mərig mə tukasarə ye nīmraghien yame in rimnərəhu karin mə kafan.^u ⁸ Ror məkneikin, yermamə yame rukreikin-pən nimeitaan kimi nəgkiarien e, pəh nien mə raukreikin-pən nimeitaan kimi narmamə, mərig raukreikin-pən nimeitaan kimi Kughen yame rimivəhsi-pə Nanmin Kafan kimi əmiə.^v

⁹ Nakwənharkun ta norien kape norkeikeiyen əmiə minə nəməhuak minə, kini in e pəh nien mə nar kirik yame jakaməkeikei mirai ye nəkwəkwə, meinai Kughen rimnhajoun ta əmiə kin mə taksorkeikei əmiə minə.^w ¹⁰ Kini nəfrakisien, naksorkeikei piautawə minə fam ye provins e Masedonia ikin nakasarə ikin. Mərig, piak minə mine nowinik minə, yakarhuh rikimiə mə taksor məkneikin mamharpin pəh norkeikeiyen kapəmiə tukreihua.

¹¹ Taksəkeikei misarkut tuk nəri-pəniən swatuk kape nīmraghien yame ramərinu, misor atuk kapəmiə wok mə takhavəh mane kape nəviginien^x, rəmhen əmə kin yame yimirhini-pre ta tuk əmiə^y ¹² pəh takhapəh nisətəgtəyen ye yermamə kirik, kini kapəmiə nīmraghien tukrivi-pə narmamə iruə minə mə tukhasiai əmiə.

Nirerig-pə-minien kape Yesu Yermaru

¹³ Piak minə mine nowinik minə, yakrhipəh nīrhorkeikeiyen mə kimie takseinein mə tukrhawor pən iran mine ye narmamə yamə mine

^s 4:3 1 Tes 5:23; 1 Pita 1:16 ^t 4:4-5 1 Kor 6:13 ^u 4:7 Hib 12:14 ^v 4:8 Luk 10:16;
² Kor 1:22 ^w 4:9 Jon 13:34 ^x 4:11 Nəgkiarien kape Gris ramni mə “Taksor wok kin kwermimiə.” ^y 4:11 Efes 4:28

kwənhəmhə ta. Nipig kimia kirik rimamhə, takhapəh nisasək-pikien rəmhen kin yame narmamə yamə mine khapəh nisərəhu-pənien nərigien kapəria kimi Kughen kisasək pik rikiria rərhakis. ¹⁴Kitawə kamhani nəfrakisien mə Yesu rimamhə mimragh min, ror pən rikitawə rirkun mə nipig Yesu tukramuə min, kini Kughen tukror mə narmamə yamə minə kimishatətə ta ye Yesu kimnhamə, tukharerig-pə min iriə Yesu.^z ¹⁵Kini yakarhini-pre nəgkiarien atuatur kape Yesu Yermaru kimi əmia, mə kitawə e yamə mine kamhamragh misarə miseriaji nīreririg-pə-minien kape Yesu, nəfrakisien, kitawə tukhapəh nisokupənien ye narmamə yamə mine kimisəkupən mhamhə. ¹⁶Mərig Yesu Yermaru atuatur əmə In tukrisi-pən ye rao ye neai meiwaiyu-pə, kini mokrən apomh, kini yemasur min kape agelo minə in tukrokrən apomh, kini naiyuk tukrasək, məkneikin narmamə yamə mine kwəshatətə ta ye Yesu, kimnhamhə, tukhamragh misəkupən misərer.^a ¹⁷Kwasig ikin, kitawə e yamə mine kamhamragh misarə, tukshaktə kitawə miriə ye napuə mə tuksəm Yesu Yermaru ye nimago-ago. Tuksarə kitawə min kape rerin. ¹⁸Takhavəh nəgkiarien e mhavəh-si haktə nərigien kin kapəmia.

5 ¹Piak minə mine nowinik minə, to yakrhipəh nīrhini-atuaturien nipig narimnar mine tukruə iran, ²meinai kimia nakwənharkun ta mə Nipig Yame Yermaru^b tukruə iran, in rəmhen kin yame yəkrəh ramuə yenpig.^c ³Narmamə tukamhani mhamə, “Narimnar fam rəmərinu, kini nahasien rirkək,” məkneikin nahasien tukruə aihuaa əmə tuk əria, rəmhen kin nəmhəyen yame ramuə aihuaa əmə tuk piraovin yame ror tipin. Nahasien tukruə tuk narmamə, tukseinein napien tukun.^d

⁴Mərig piak minə mine nowinik minə, kimia nakhapəh nisərerien ye nəpignapien mə to Nipig Kwasig ramuə, to nakhapəh nisakurien rəmhen kin yame yəkrəh kirik ramuə tuk yermamə, in rakur. ⁵Kimia mifam ji nikhakien mine niraanien. Kitawə pəh nien mə narmamə kape nipigien uə nəpignapien.^e ⁶Ror məkneikin, pəh tukhapəh nisorien rəmhen kin narmamə yamə mine kisapir. Mərig pəh kisarha, masəm huvə kapəhawə nərigien mine norien minə, ⁷meinai narmamə yamə mine kasapir, iriə kasapir yenpig, kini narmamə yamə mine kasapis, iriə kisapis yenpig. ⁸Mərig pəh kitawə tukseihuə ye norien minə kapəhawə, meinai kitawə narmamə kape niraanien. Pəh kharaptərəkin norien kape nhatətəyen mine norkeikeiyen, rəmhen kin yame mobael kirik yame ravəhsi-pən aean kirik yame ramətapig kin nimagen, kini pəh kisərəhu-pən tim-tim kapəhawə nərigien kimi Kughen, rəmhen kin mobael kirik yame raukrai pən kəvəvhao skai yame ramətapig kin kapən kapə.^f

^z 4:14 Rom 14:9; 1 Kor 15:3-4,12 ^a 4:15-16 1 Kor 15:51-52 ^b 5:2 Ol Testamen raməvsao kin “Nipig kape Yermaru” ye Joel 2:31, Amos 5:18 mine Malakae 4:5. ^c 5:2 Mat 24:42-43; 2 Pita 3:10; Rev 3:3 ^d 5:3 Mat 24:39; Luk 21:34-35 ^e 5:5 Rom 13:12 ^f 5:8 Aes 59:17; Efes 6:14,17

⁹Pəh kisor məknaikin meinai pəh nien mə Kughen rimirpen ətawə mə tukror niemhaa mine narpinien kimi ətawə, mərig rimirpen ətawə mə tukrivəh miragh ətawə ye Yesu Kristo Yermaru kapətawə. ¹⁰Rimamhə tuk ətawə, yamə mine kamhamragh mine yamə mine kwənhamhə ta, mə kitawə m-fam tukharkun narəyen kirikianə kitawə min.^g ¹¹Ror məkneikin, takhavəh-sihaktə nərigien kapəmiə minə, kini misasitu irəmiə minə mə taksor nhatətəyen kapəmiə rəusik-əusik. Nəfrakisien, in ai nakasor ai taktəkun mine.

Nəgkiarien infamien

¹²Piak minə mine nowinik minə. Taktəkun ai yakarhaiyoh əmiə mə takhasiai narmamə irəmiə yamə mine kasor wok ripsaah. In e yamə mine Yermaru kapətawə rimirpen əriə mə tukhakir əmiə masəvhag kimi əmiə. ¹³Takhasiai huvə əriə, misorkeikei əriə tuk wok yame kasor, kini misarə ye nəmərinyen kimiə miriə. ¹⁴Kini piak minə mine nowinik minə, yakarhuh rikimiə mə taksor kwirig kimi narmamə yamə mine kasarpah. Havəh-si haktə nətərigien kape narmamə yamə mine rikiriə rəpou. Misasitu ye narmamə yamə mine kapəriə nəsaninien rirkək. Misor nərigien kapəmiə rəpomh tuk narmamə mifam.^h ¹⁵Tukmə yermamə kirik ror nar kirik ripəh nəmhenien ye nimirimə, kini kimiə takhapəh nisorien tai norien yame rimnor, mərig nipig mifam, takasəkeikei misarkut mə taksor wok huvə kimi əmiə minə mine narmamə minə fam.ⁱ

¹⁶Nipig mifam rikimiə tukramagien;^j ¹⁷nipig m-fam taksəhuak kimi Kughen; ¹⁸nipig m-fam takhani vi vi Kughen, nar apnapig mə naksarə ye nihuvəyen uə nahasien. Taksor nəgkiarien misir a meinai in a nəkwai Kughen tuk əmiə yamə mine nakasofugin-pən ye Yesu Kristo.^k

¹⁹Takhapəh nisarər-əswasigien kin nherien nap kape Nanmin kape Kughen.^l ²⁰In ravəhsi-pən nəgkiarien kimi profet minə, kini takhapəh nhaniyen nar apnapig iran; ²¹mərig taksəm huvə misəkir huvə narimnar fam, mharaptərəkin tim tim nar huvə minə, ²²misəpəh narimnar fam yame raha.^m

²³Pəh Kughen atuatur, In Kughen kape nəmərinyen, In tukrərəhu karin əmiə mə kafan minə. Pəh tukror mə rikimiə m-fam, mine nimiraghien fam kapəmiə, mine nipraimiə mifam tukratuatur mə nipig Yesu Kristo Yermaru tukrirerig-pə min iran, nar kirik rirkək irəmiə mə to kini hah əmiə iran.ⁿ ²⁴Yermamə yame ramokrən kin əmiə, nipig m-fam tukror kafan nəgkiarien, kini In tukror narimnar minə a.

^g 5:10 Rom 14:8-9; 1 Tes 4:14 ^h 5:14 2 Tes 3:6,11 ⁱ 5:15 Rom 12:17; 1 Pita 3:9

^j 5:16 Fil 4:4 ^k 5:18 Efes 5:20 ^l 5:19 Efes 4:30 ^m 5:21-22 1 Jon 4:1 ⁿ 5:23 2 Tes 3:3

²⁵Piak minə mine nowinik minə, səhuak tuk əmiə minə.^o ²⁶Sokrən huvə irəmiə minə^p, rəmhen kin yame kimiə kirikianə ye Yesu Kristo.

²⁷Ye nhag Yesu Yermaru, yakamarkut mamni-pre tim tim kimi əmiə mə taksəvheikin nəkwəkwə e kimi piak minə mine nowinik minə fam.

²⁸Pəh Yesu Kristo Yermaru kapətawə tukrautə-pre kin kafan nihuvəyen kimi əmiə.

^o **5:25** Kol 4:3; 2 Tes 3:1 ^p **5:26** *Gris ramni mə* “Nipig naksofugin əmiə minə, taksor ‘holy kiss’ irəmiə minə.” ‘Holy Kiss’ ror nimtətien mə kasofugin pən ye Yesu masorkeikei əriə minə.